

Lia Rumantscha ha edì in nov gieu

■ **(Ir) Suenter ils gieus «Gieu dal gaud» e «Tschappa e scappa» preschenta la Lia Rumantscha in ulteriur gieu. I sa tracta dad in memori che tematischescha las quatter stagiuns.** Ina da las finamiras da la Lia Rumantscha è da promover ch'i vegnia discurre rumantsch en las famiglias. Causa che la furma da gieu è ideala per quest intent ha la Lia Rumantscha edì il «Memori da las quatter stagiuns», sustegnì finanziailmain da la Banca Chantunala Grischuna.

Dapli che in memori

Il gieu da memori consista da 42 cartinas. Sin questas èn maletgs da las quatter stagiuns sco er ils pleds u ils texts correspundents. Adina trais cartinas tutgan

ensem: cartina cun maletg, cartina cun text e cartina cun maletg e text. Questa furma da memori permetta dad emprender la lingua da maniera persistente. Cun giugar trenesch'ins la memoria ed il medem mument emprend'ins era pleds rumantschs. La cumbinaziun da maletg e text promova en pli l'abiltad da leger.


Per tgi è el destinà?

Il gieu è fitg bain adattà per uffants e creschids, è damai propi in gieu per famiglias. Uffants a partir da 5 onns pon, cun far il gieu, engrondir lur stgazi da pleds. Ensem cun ils confamigliars datti lura forsà discussiuns areguard ils maletgs designads dad *Annalis Vieli*. Quels èn fitg

attractivs e fan plaschair da prender en mauns las cartinas. Uffants che san leger pon far il gieu era be sulets. Ils creschids che vulan emprender rumantsch emprendan la lingua facilmain perquai che emprender ina lingua da maniera ludica ha savens la consequenza agrebla che quai emprendì resta bain en memoria. Dad associar il pled cun la chaussa gida a tegnair endament pli bain la noziun.

Nua retrair?

Il «Memori da las quatter stagiuns» datti en tut ils idioms ed en rumantsch grischun. El po vegnir cumprà tar la Lia Rumantscha ed en las librerias e butias che vendan ses products. Il pretsch è 39 francs.



Il gieu da memori consista da 42 cartinas.